

## Adventstied

Op d'r veerde zondig vuur krismes wurd gevierd,  
Sjart de Adventstied zoeë is os altied gelierd  
'n nuuj kirkelijk joar sjeet dan op 't punt van beginne  
'n tied van bezinning, ooch dat mot waal ins kinne

't woeërd Advent kumt aaf van "Adventus" oet de latiense taal,  
Mer wat betekent deë advent noe precies, weten v'r dat allemoal waal?  
Dat wurd hie noeë vuur jieëdereë oetgelag,  
Dan is ooch dat tenminste ins 'n kiër gezag!

"Adventus" betekent "komme" in ozze eëge taal,  
Mer alleen dat te weten is toch waal hieël erg kaal!  
Dat dit 'n verwiezing is noa 't miensjweëre van 's Levenhieër op eërd,  
Is om te weten toch al weer van veuël groëtere weërd!

Precies gesjtilt verwieft 't noa de komst van ziene zoeën Jezus Christus,  
Deë, zoeë es v'r zouwe motte weten, wurd geboare mit de Krismes.  
Juus op dit fieës is de Adventstied de vuurbode,  
Mer 't is ooch een tied van boette en inkieër, dink ooch os aan ozze geboden!

D'r Adventskrans is 't meest bekinde Adventssymbool vuur os,  
Dat is inne krans deë liet dich in die tied ooch absoluut neet los!  
Woeërom is deë Adventskrans bedach, is doa uëver noagedach?  
Dat wurd noë dan ooch meteen hië mer oetgelag!

Deë krans is gemak van dennetek en die blieden ummer greun,  
Heët dat noch 'n betekenis of is dat egelik hieël geweun?  
Geweun is 't neet, want 't is 'n verwiezing noa het ieëwige leëve,  
Mer kint os ooch genug vruid in de Adventstied geëve

De 4 keërskes weëre op de veer zondige achterevolges aagemak,  
Ooch dit is neet zoeë mer get, mer 'n symbool dat os altied waal weer rak!  
't sjeet vuur hoap en es 'n teke vuur de korter bie kommende krismes,  
Dat in de Duusternis veuël mieë leech gieëf doeër de geboorte va Jezus Christus.

Zoeë, noe is de achtergrondj van Advent bie uch allemoal bekint,  
't is dus mieë dan alleen mer affille tot de Krismes begint!  
Es v'r dit soort periodes ins get mieë weërd mit zouwe geëve,  
Goof ooch dat weer 'n sjtukske mieë voldoening in 't leëve!  
Ron Logister.

## Geleuve

Doe hoofs van de luuj  
Om dich heer neer alles te geleuve  
Wenst-e mer de mood has  
Om in ze te geleuve  
Wiel Roeselers

### Wit

Wit is der grónk  
Wit is der weëg  
Es ich der sjtoep neet veëg  
Wit zin de sjtruuk en de moere  
En wit is de hék  
Inne voeëgel zit te loere  
Noa eek leen sjtukske wek

Wit is 't graas  
En gries is de loch  
Wit is mieng vinsterglaas  
Wit zint de vlökskes en zach  
Ich keek noa inne voeëgel en dach  
Dae hat ng noeëts gevas!  
De kater sjlieëpt mar wach op de nach!  
Jan halmans

### t Fieës van Sinterkloas

Hoeëgroeë bakke  
Sjpanning op 't gezich  
Wisselend bang en bliej  
De oge op de duër gerich  
Wiebele op de sjtool  
De nerve sjlont op de bloas  
Dat is 't kinjerfieës  
't fieës van Sinterkloas  
Wiel Roeselers

### Winkter...

't Is winkter en d'r vrós,  
versjteent 't grieze water.  
De hagel sjmikt 't kouwe land,  
dat wacht op wermte, later.

D'r winkter is ing tied van sjtilte,  
van wieëmood en erinnering,  
gedanke goan, gedanke kómme,  
aan 't vöale dat verlore ging.

Dan daalt op vluëgele van d'r wink,  
sjnei neer óp veld en sjteë,  
en makt ing blauwwit sjprookjesland,  
't duuster tot verleie.

Thei Janssen

### Kunsgebitte

s 'Nachts, wen alle miensje pitte,  
reze beksjkes kunsgebitte,  
same gans Europa rónk,  
ganse bek vol valsje teng,  
goan langs zieë en langs leng,  
sjtiege óp en goan wer lande,  
langs de kuste en de sjtrande.

De egenere die van nieks wete,  
de rieke en óch prolete,  
hóngorig of volgevreëte,  
ligge in hun bed te zjwete  
bis d'r wekker s'mörges sjelt,  
en hun oet de bedder belt.

Ich sjtoan dan sjtram en sjtief mar óp,  
mieng hoar die sjtoan nog sjtiel rechóp,  
in de badkamer gans vuuraa,  
lacht mieng kunsgebit mich aa,  
en ich dink dan "potverdomme...  
gelukkig is mien dreum neet oetgekómme,"  
en ich vroag mich aaf wie ich zoeë sjtóm  
noe wer aan deë zever kóm....

Thei Janssen

### Kling Meëdje

Ee kling meëdje oet de Musschemig  
Leep mit ee boeketje va wil blomme, oet gen veld  
Gans i gedanke vuur zig  
In 't angere hendje houw 't geld  
De blomme woare vuur ee kink dat woar erg krank  
't Meëdje woal vuur 't geld ing keëts kope  
Béj Antonius i gen Vrank  
Ginne weëg woar vuur heur te lank um te lope  
Vuur beëtersjap en dank

Jan Halmans

### De litste zonnestsjtroal

Wie 'n bleëdje in de windj  
Dartelt doa 't klene kindj  
Mit oape hart en oape erme  
Lieët 't de noajoarszon zich werme  
Mit blauwe oge en roeë bakke  
Kriet 't de litste zonnestsjtroal te pakke

Wiel Roeselers

### Herfs

't greun van de beum,  
verenderd van kluur,  
ing sjmaal sjtriepke zónleech  
vilt durch ing sjplieët van de duur,  
en tovert mit roeëd  
en mit geël aan de eek,  
mien oge gónge troane  
wie ich dat sjoëns bekeek.

Toch valle de bleëdjjes  
d'r ee vuur ee aaf,  
zoeë numt d'r Hergod  
wer trük wat Heë goof.  
Wannier zou 't mieng buurt zien...  
en die van dich, leve miensj?  
D'r is ging hoas bei  
mar...kómme deed 't...ins.  
Thei Janssen

### Vergeëve

Du zuus deë miensj heët 't zjwaor,  
Kumt mit de situatie gaar neet kloar!  
Heë wurd totaal gesjtuërd,  
Van wat d'r tusje uch is gebuërd.  
Loat 'm noe neet valle,  
En zit dien hakke neet in het zandj!  
Gank ins mit 'm kalle!  
En zit diene sjroom aan de kantj!

Want bedink dich dat 'n ruzing  
alleen verleezers kint,  
En alleen es-te 't good maks  
jjeëderree d'r van lieërt en wint!  
Ron Logister.

### Wintjerbuusj

De beum oame der wintjer oet  
Mit kale tek reke ze i gen loch  
Es of ze hel rope wille  
"Vieër hubbe van de kou genog!"  
Alleen de huls is glanzend greun  
Mit de tek vol kieësje in roeëd  
In onge kou geboage graas sjteet  
Ene bereklauw versjtard en doeëd  
Ich zieën wie 'n hand paddesjteul  
Aan ene boomsjtronk kleëft  
't glinstere water van de beëk  
liekt 't insigste dat leëft  
Wiel Roeselers

### krismes

V'r herdinke mit de krismes dat Jezus Christus is geboare,  
Doeër dat te doen wete v'r dat v'r nog neet zunt verloare!  
Es v'r rond 't vredige tafereel rond d'r krissjtal zitte,  
Is 't good es v'r ins hieël good op de boodsjap zouwe litte.

De boodsjap van krismes is ooch: vrede op dis welt,  
Loate v'r os verdrage en neet ummer mit veuël geweld,  
Stjrieje vuur os geliek of 't ummer mieër mach kriegende geld,  
Jièderree is geliek, es v'r dat allemoal beseffe is d'r een beëtere welt!  
Ron Logister

### Winktersjport

Twelf joar is 't al geleie  
dat ich ging skieje en ging sjeleie,  
mar wen 't weer neet beëter weëd,  
dan ving ich winktersjport nieks weëd

Doezend kilometer rieje  
óm in de Alpe kou te lieje,  
dus wen 't weer neet beëter weëd,  
dan ving ich winktersjport nieks weëd.

Ich höb gehoeëd dat 't doa zoeë duur is  
en dat de wien zoeë zoer is,  
en es dat neet beëter weëd,  
dan ving ich winktersjport nieks weëd.

ich höb gehoeëd ,dat zind mien zörge  
dat 't doa sjeit en reëgent jieëkere mörge,  
en wen dat neet beëter weëd,  
dan ving ich winktersjport nieks weëd.

Ich goan waal noa de Broenssemerhei,  
dat is óch vöal kóttterbei,  
s'oavends heem 'n good glaas Port...  
ich hoof neet noa de winktersjport  
Thei Janssen

### Wunsj vuur de fieësdaag en 't nuje joar

Vieër wunsje uch allemoal sjoëene fieësdaag,  
Dat 't uch allemoal veuël bringe maag.  
Vuur 't nuje joar nieks dan good,  
Verlees in jieëder geval neet de mood.  
't Belangriekste is toch een goeije gezondjheid op de welt,  
Vieër hoape dan ooch dat die vuur uch allemoal is besjtilt!

En vuur sjtrak: inne hieële sjoëene vastelaovesdied,  
Geneet d'r van, want wat-ste gehad has, rak-ste noeëts mieër kwiet!  
Ron Logister.

### Krismis-trend

Plastic keërse mit elektrisje vlam  
Op der boom geklemp mit greune klam  
Breëkbare bul in all bontje kluère  
Ekele, paddesjteul allerhandj figuëre  
Een bontje mengeling in leech zoeë kloar  
Onger ´n waas van ingelehoar

Doa onger ´n sjtelke van birkehoot  
Hoe teëge aa get wintjergreun zoot  
Van ´n sigarekiske ´n deëkske drop geklop  
drombie get mos van ´t pannesjop  
in ´t sjtelke zeëgmeël of witte zandj  
en dan nog get boomsjors langs de kantj

Dan koame giepse beelde der in te sjtoa  
Dat woeërd mit zurg hoas plechtig gedoa  
´t Kiendje woar ´t ieësjte aan de riej  
En dan Maria, Jozef, os en eëzel drombiej  
De herdere mit sjeuëp en hondj get wiejer aaf  
En de kuëninge die wachte hunne tied nog aaf

Tek mit groeëte denne-eppel aan de moer  
En hie en doa get zilvere lametta der doer  
Inne knoa watte dat leek waal ´n snjieëvlok  
´n Lintj mit zilvere bul aan de sjtoande klok  
´n sjoal mandarijne en een mit nuët om zelf te krake  
Bie de teijer ´n fien tekske huls om ´t aaf te make

Dat woar joar in joar oet ´t zelfde ritueel  
Hoe-ste noa oet keeks dat wat dich gevoel  
Gene sjtres me prebeerde ´t geveul te vange  
Uëvertuging woar belangriek, de sfeer, ´t verlange  
De luuj woare bezig mit zichzelf te geëve, te ute  
En neet uëver de ruk van t sjtelke te sjtute

De winkele hange vol, jieëker joar angere prul  
leësj woare ´t roeë, dan zilvere, dan bontje bul  
Ummer vreuger, sinterkloas geet achterop rake  
Omdat de winkele wille verkope, omzit wille make  
..... En noe, noe wurdt jaarliks noa de winkel gerent  
Angesj, och erm mist doe der litste nuje trend

Wiel Roeselers

### Sjpreëkwuërd

Ich eët wat op ge dusj kumt - Ik stel geen hoge eisen  
Windj i gen buusj hubbe - Platzak zijn

d'r Sjneiman

't Sjneit vlöksjke noa vlöksjke  
't is ing witte welt  
Vergeeët 't klöksjke  
vuurdat 't sjmilt

inge bessem  
inne wortel in zien gezich  
ing mutsj en ing sjal  
dan vruid heë zich

ózze sjneiman  
mót de sjunste zien  
woeë is miene wortel  
vröagt 't der knien

Thei Janssen